

MB Pahang gesa Muhyiddin dikenakan tindakan tegas sengaja sentuh isu 3R

Kuantan: Menteri Besar Pahang, Datuk Seri Wan Rosdy Wan Ismail meminta pihak berkuasa mengambil tindakan sewajarnya terhadap Tan Sri Muhyiddin Yassin yang secara sengaja mencetuskan suasana tidak harmoni dengan menyentuh isu 3R merujuk Raja, agama dan kaum dalam kempen politik.

Naib Presiden UMNO itu berkata, tindakan terhadap Pengerusi Perikatan Nasional (PN) yang juga Presiden BERSATU

itu penting sebagai pengajaran dan peringatan kepada semua pihak.

“Saya berharap rakyat di negara ini perlu terus menghormati institusi diraja yang menjadi lambang kedaulatan dan kestabilan negara, serta simbol penyatuan dan pelindung rakyat jelata,” katanya menerusi hantaran di Facebook.

Wan Rosdy berkata, beliau kecewa dan terkilan dengan ucapan Muhyiddin ketika berkem-


pen pada Pilihan Raya Kecil (PRK) Dewan Undangan Negeri (DUN) Nenggiri di Gua Musang yang secara biadab menyentuh kewibawaan Sultan Pahang, Al-Sultan Abdullah Ri'ayatuddin Al-Mustafa Billah Shah ketika baginda berkhidmat sebagai Yang di-Pertuan Agong Ke-16.

“Sebagai mantan Perdana Menteri, Tan Sri Muhyiddin tidak sepatutnya mengheret institusi istana dalam kempen politiknya yang sempit semata-ma-

ta untuk meraih undi dan mengaburi rakyat mengenai apa yang berlaku pada Pilihan Raya Umum Ke-15 (PRU-15) lalu.

“Saya yakin dan percaya, rakyat juga sudah mengetahui dan bersetuju bagaimana kewibawaan baginda Tuanku berjaya menghentikan kemelut politik negara daripada terus berpanjangan dengan menubuhkan Kerajaan Perpaduan, di mana PAS dan BERSATU menolak titah Tuanku ini,” katanya.

“Saya berharap rakyat di negara ini perlu terus menghormati institusi diraja yang menjadi lambang kedaulatan dan kestabilan negara”



**Wan Rosdy
Wan Ismail,**
Menteri Besar
Pahang